

四庫全書

集部

欽定四庫全書

集部

滴水集卷九

詳校官庶吉士臣吳烜

侍讀臣孫球覆勘

謄錄貢生臣湯逢泰

欽定四庫全書

滴水集卷九

宋 李復 撰

五言古詩

雜詩

猗蘭生幽林秀葉凝綠滋含芬靜不發默與清風期美人閑婉變遺世從雲螭袖中雙珠明照人冰玉姿羣動溺憂患閔尤無同嘻寂寥歲將晚獨往歌紫芝

應龍出重淵矯矯昇天行奮迅彌宇宙雨施品物形收

藏入無間脗合元氣冥神變不可測乃知至陽精聖人
鍊陰魄調御元功成乘時萬類覩廓然日月明體用符
龍變潛躍惟時亨顏伏德方求舜見位已升

霜葉下高枝紛紛擁寒根驚風度虛庭撼撼愁飛翻草
木雖無知養本亦足論人生感元化道貴窮性原滋口
芬羶亂悅耳聲音繁衆攻日外戰目暗天地昏不問昆
侖清但愛長波渾神馳正氣潰白日鬼瞰門

春鳩啄晴屋露蟬吟高枝羣物感氣動飛鳴不自知冥

心觀物化浩劫密推移欲從扶桑翁雲間玩陽曦

珍圖出滎河八卦開奧秘聖人重因襲已極露隱細大
衍四十九周流通一氣陰陽窮必變往反無終始元化
密推移消長先默契鬼神無遁情垂詔億萬世如何揚
子雲求名誇譎詭藻繪太初歷設畫隨啟閉盈縮無常
運躋羸謾擬議安得宇宙間別更有天地文字但艱苦
白首困心志侯芭何所知枝指徒為贅

陽剛形發輝陰凝體受照金魄遡火鳥進退見胸臆氣

引潮海壯象推介蟲小南北應坎離東西正昏曉

萬物忘我難聖人出同憂女媧斷鼇足軒轅殛蚩尤禹
命洪水又稷播百穀修元德與天通珍符告帝休起皆
不得已本非功業謀應龍潛深淵睢盱寒水秋乘時御
風雷雨施化形流體異靈氣同默契神變求

陰陽體合氣氛氲極無際卦氣交孕毓旁滋六爻備聖
人繫爻辭鈎賾推母子觀應以知來隨方推象類靈龜
通火志黃牛革得地復應乾龍潛兌乘履虎尾周流紛

參錯往來精妙義
惜惜妄穿鑿執一千百廢孰能訪太
極與遊兩儀外

衆輻共一轂利用本在無制法應世變欲返民心愚巧
智起頽波但逐末流趨烏亂畢弋多真風日更疎

一氣偶暫聚靈府含虛明至人遺世氛妙靜無將迎索
珠迷罔象鼓琴有虧成蓀蓀千海波全潮浮漚輕

杯水入滄溟浩浩通無際原心方寸間混合周天地后
稷勤稼穡顏淵甘簞食行已在一時流芳播萬世至道

不遠人安行近且易

高松懷正氣挺特入空碧短棘無直枝千鈎未成尺松
生倚雲岡棘散傍道側道側侵行人牽衣去不得絲蔓
亂附託狐狸喜偃息美惡類相感庸詎分知識秋風葉
落時礙眼如矛戟斤斧不得施悵然空歎息

翩翩雲間鳥翠羽光葳蕤結巢占遠林意與深靜期盲
飈忽號怒萬木無停枝歌搖不容息簸蕩孤巢危遐睇
昆崙岡玉樹蔚仙姿溟海皆震蕩秀立影不移空懷高

舉心感歎鼓翼遲

晨炊未登盤飢腸已戚戚欲問堂上人先聞發歎息苟
念一餉飢况艱終歲食茫茫九州間幾人悲罄室吾欲
呼天工驅雷駕雲龍十日一風雨五穀年常豐佩刀化
為農孫哺百歲翁完助陰陽功不顧吾盤空

沙虛路傍泉江通石上井泉挹淺沙黃井汲深江冷六
月火雲生旱鳥炎午影煩心欲清滌呼兒問修綆

黃河走東溟不知幾萬里奔騰鼓風雷勢欲卷厚地百

川隨呼吸渾渾失氣類正德不可亂橫絕見清濟詭士
富縱橫機辯回天地觀其投說時揣摩探人意高論未
能窺茫然何所試髣髴一隙開洶湧驚濤起陰闔拒其
惡陽開示其喜危冠揖時君擔簦擅國勢六印黃金多
雙壁連城貴歲晚客子來傾變心若死

權利為禍根苟合非純士嗟哉憑軾生行見烹齊市晴
鳩不逐婦猛虎不食子魏國將樂羊齊人疑吳起凶險
甚鳥獸妻子自烹死嗚呼天壤間親無骨肉比殘毒就

功名于君安可恃中山昔置相嘗取放麋翁異類猶有
恩事君必致忠

經界廢已久王者無尺土強力喜饕吞含血不肯吐孱
弱困道傍性命輕毫縷為政須務本析薪何匪斧

浚泉少汲水汲多泉水汙力穡莫握苗握苗苗必枯心
清事自簡氣和體必舒古人有至言治民如烹魚

先王急民事分吏察墾畝田荒宅無毛置法責粟布壤
壤一歲勤暴暴三年聚農政久不條幾家有禾黍

當路莫張機張機不可行潛深巢高杪魚鳥知愛生立
義禁為非意欲求無刑刻核苟太至視死心亦輕

善學必探本知本貴善養種木既得地柯葉日滋長紛
紛綺語工汨汨良心喪多聞竟無益不如雞犬放

姬旦相孺子不為召公知洛陽賈年少豈免絳灌疑論
遠必為迂舉高遂有危更無反木風但起弔湘悲

讀陶淵明詩

淵明才力高詩語最蕭散矯首捐末事濶步探幽遠初

若不相屬再味意方見曠然閑寂中奇趣高蹇嶮衆辭
肆滂葩姦恠露舒慘彫刻雖云工真風在平澹距今幾
百年有作皆媿赧予嘗跂清塵忽忽氣相感安得起從
遊絕頂與同覽

明月入我牖

明月入我牖娟娟滿衣裳驚風飄疎竹凌亂舞清光靜
坐不能眠稍知秋夜長却思古人書探編開縹囊一讀
三四反人遠心茫茫投編出庭宇回步影徜徉長空散

白露暗落點青黃肅肅晨氣動滿地自為霜

山中有桂樹

會上分得
題得綠字

山中有桂樹
繆虬散巖曲
高枝動秋風
霜凝不改綠
美人與世遠
嘯歌樂幽獨
揮手弄浮雲
寒光滿空谷
忽忽自搔首
神馳逐清躅
何時山下泉
一濯飛塵足

和人子夜四時歌

井上梧桐樹
花黃落點衣
夜深花裏鳥
相並不相離
美人朝汲水
驚起却雙飛

綠絲絲縷長當窓織流黃纖纖弄龍杼不作舞衣裳裁
縫付邊使豈待見秋霜

蕭蕭庭下柳曾學舞腰支秋風吹暮夜半落小蛾眉人
生自無定空歎葉辭枝

窈窕月華來對月理瑤箏將心託絃語幾弄未成聲非
關霜氣澁不忍苦分明

有客山中來

有客山中來遺我雙雲松身雖咫尺長勢有百丈容空

庭土花碧不種夭桃紅春悲香魄盡秋怨綠枝空喜見
石上根移從最高峯愛植朝暮勤待看凌霜風何時舊
山雲出隨淵中龍沛然灑好雨助我栽培功

翠碧

翠碧曳長啼翩然上庭樹花枝搖未定驚顧却飛去豈
不愛芳陰自憐好毛羽苦為艷粧求刻鏤點金素五陵
遊俠兒挾彈馳長路華絨毛垂金豐豹文濯霧懷珠蚌
必剖戴角犀多忤志士無懷壁懷璧出逢怒

病目

昔年勤細書廣博求多益謂經手一抄可勝讀數百砵
砵三十年嘗廢寢與食磨墨見硯穿敗筆如丘積高編
連大軸不知幾萬億當時氣血盛未覺損目力今年四
十六百病乘其隙雙瞳舊勞甚凝血聚成脉虛炎更上
攻常若包芒棘遠視但眈眈浮空亂花黑少功跂前修
鑽仰極窺測志欲繼絕學九萬希鵬翼求於形器外脫
然有所得上友千古魂神遇展良覲年來老且病筋骸

當少息六物已熬成昏氣須清滌

物我

萬物生芸芸與我本同氣氤氲隨所感形體偶然異立
嶽孰為高塵粒孰為細忘物亦忘我優游何所覲

自省

理容本求妍造次遽成醜兢兢早夜思猶或失於偶放
而不知察美種雜稂莠吾居日三省參也吾所友

自訟

前善後隨非失於任私意短長莫可欺明者未免蔽改
過心每憚責人夫何易芸苗捨已田無獲亦蹈厲

自暴

交際知其心莫良占辭氣聲音施施然已拒弗肯至忿
戾無少容安能喻美意人懼有失言愬爾絕于世

白日

白日懸虛空春秋變寒暄但流地上影不照地下魂慘
慘暗陋巷炎炎曜華門浮生蕩無根萬古悲黃昏

感春

新槐未成陰藤花如紫雲
蒙蒙出高杪花葉不可分
雙鳩接翼飛搖蕩花紛紛
曦車不肯留感嘆愁夕曛

三月無餘旬此日足可惜
桃李不自由相期偶相失
黃蕪菁花青青陵陂麥林間
晚蝶飛翩翩竟何益
前晨遊百花天艷闕顏色
柳枝弱而細閑垂亦自得
今日偶再來羣枝空寂寂

桐花開最晚香泛已冪冪
高榆散枯錢狼藉走荒陌
聞

歌情亦倦對酒意不懌非傷春遽回第覺老相逼願訴
東皇君撫轡留歸迹百年雖無多亦稍緩偏側

早起

羣鳩啄屋鳴亂雀翻簷噪喜呼怒爭逐往來競酣鬧陽
氣動飛潛得意相陵暴曉枕不能眠開門適情好酌泉
供清盥短髮巾野帽中心曠無事焚香誦真誥人生襲
元精含和百神抱失足落陰界久困羣邪耗漂溺孰能
回浩劫沉波潦玉鏡動悲雲慈航引清權惟予久冥寞

區區謝初少三疊舞胎僊八景駐霞翹稽首躡祖風中
天延義照

登上黨郡樓

羣山合沓來回抱東林缺紫翠不可解環城如玉玦龍
飛晉水清天轉旄頭滅蕭蕭古戰場春耕擁殘雪

正月五日遊曲江

今日意何適出遊曲江湄野晴天澄穆風柔物閒熙淺
岸水已盡長原麥含滋躍鱗向日光浴羽侵水嬉悠悠

南山雲浮空久不移
爛斑壠東雉鳴呼
聲喔咿春序茲
方交春物已若斯
眷子同來者酌酒
衣淋漓莫學少陵
翁淚點吞聲垂且
效陶淵明為題斜
川詩

樂遊原

重岡帶南山起伏波
濤驚古原枕隍洲
森爽東西橫陰
宿忽自開秦川一
半明莫動興廢悲
惟喜禾黍晴

過彈箏峽

悠悠薄洛水東出
彈箏峽昔人感秋
聲舞躍中音節我

來跨官馬屢渡隨曲折水寒石齒澁鳴調苦悲咽應有
征人淚泠然灑清血含恨變舊音冷照關山月袞袞東
入海餘情流未歇掩耳不能聽揮鞭急超越穿雲望前
壘晚路山雨滑去遠猶自聞回腸危欲絕

曲江

唐址莽荆榛安知秦宮殿常因秋雨多時有微泉泣菰
蒲春自生鳬鷺秋猶戀千古蔽一言物極理必變

玄都觀

龜刻露蘚暗石壇霜草黃
斷瓦出耕土猶有金碧光
甘泉分遠脉來自惠山長
桃花久不開空餘葵麥荒

清明渠

清明三十里疏鑿高下通
西南引滴水北入太極宮
居民昔為利舊跡今可窮
時見斷石甃龍盤戲雲風

登高丘望遠海

登高望遠海冥冥濕天際
百川趨東南奔騰卷厚地
自從開闢來溶渟不可計
浩浩無增虧周流在一氣
怒風

駕高浪雪山寒，
顚飛火掣電光。
神怪時出戲，
却疑蓬萊峯。
只是蛟人鬢，
會當見清淺。
乘月弄蘭櫓，
去問蟠桃花。
花結根幾千歲，

江行至黃牛廟山，
特奇秀，晚議舟廟下，
留詩於壁。

層峯浮雲空，
亭亭出衆嶠。
芬敷如青蓮，
飛光亂寒照。
霜楓雜丹碧，
瀑布垂窈窕。
秀色紛異狀，
爭奇動奔峭。
歛失畏嶮心，
頗愜賞幽好。
舟行不暇徐，
粗得領其要。
隨風轉

隈曲晚泊黃牛廟杖策登東岑周睇萬山與臨岸理晚
餉問客賣早稻明朝走夷陵便入襄陽道從此步平陸
歸程已可料

峽山遇雨

侵曉登楚山山峻苦難陟半山忽陰晦舉手不可識躋
攀穿雲過赫然見日出俯視雲氣中洶湧浩無極滉漾
雪海翻兀硤寒冰立蛟龍見或沒髻鬣火旆赤風雷恣
飭礚萬車無轍迹神君互麾訶衆怪爭跳躑變異從何

來萬態不可測峯頂日精明下方驚雨急倏爾寂無聲
昏翳豁開釋返照光景新巖岫翠欲滴瀑泉縞帶垂稻
塍清流溢高路靜無泥牽挽望前驛世俗信耳目天地
度以臆安知視聽外奇駭可窮索孰知滄溟寬但見蹄
涔窄茲事非傳聞吾行所自覲

西湖寺

舊聞宣律師戒行極精苦眉毫出寶珠錫杖解鬪虎登
壇三十年布薩度緇侶故物今餘何石像暴風雨

周巨寺

長楊夾通津修竹帶北岡尋行不知遠時聞芝香渡
溪陟翠巘松柏高蒼蒼木杪見櫺簷塔廟居上方盤步
曲折峻入門庭宇荒道人貌清羸趺坐臨朝陽手持天
竺書貝葉翻金光爐殘柏子燒龕續明燈長見我默不
語舉杖鳴匡牀以示清靜觀妙出轉徙鄉我從絕塞來
塵侵兩鬢霜形骸久顛頓思逐歸鳥藏偶來叩禪局寬
與人世忘金篦刮病膜清水沃煩腸鐵牛耕石田海底

種扶桑超然越初地青蓮泥中芳

陽華夫人祠

陽華少夫人飛香度青冥輕明弄餘妍疎雲含曉星粲
然啟玉齒流電交回熒立久忽飄去暮山風泠泠

因何常德招遊西塔有詩遂和

支提壓西城境絕天香集招邀乘逸興步駛追隨急到
門病眼明曉逐秋雲入浮屠喜躋攀萬象在拱揖古洞
積陰靄暗澹龕像濕登茲翻百憂履危非我習南山西

出秦迤邐序等級北渭東赴海洶湧動都邑林梢見新月
整歸尚依鬱興來莫重辭時節不可及

觀西華推

高山何時推谿衍作空谷擁土起重岡斷石大如屋狀
泉盡涌發散漫流新淥南淵勢最廣百畝亭澳曲龍威
儼睢盱神靈不敢觸茲舊多園囿修篁帶喬木今忽掀
阜亂高下眩人目惟羨勢雄尊作鎮屹西服嚴威物所
仰宜滋萬生福胡不靜歸根震蕩屢翻覆天地域中大

奔馳猶未足世事百年間反衍如轉轂開闢浩劫來攬
之不盈掬紛紛祇如此於予幸乞獨歸來拂虛榻孤坐
但冥默

美原縣北軒

淵明昔遯世北窓朝脫巾清風一披拂自謂羲皇人冥
冥孤鴻姿真與浮雲親寂寞千載後遐躅空遺塵嗟予
敢言勇斗祿徒為貧形骸強包裹種種秋毛新竭來渭
水陰訟簡民風淳因喜縱懶僻鑿牖開星辰吏散鳥下

階清談可娛賓歸去終亦賦聊此蟠窮鱗

西崦人家

處陰體生疴居高地多風結廬西崦間溫清適炎冬長
楊帶疎籬綠畦分西東門前澗水流繫柳橫橋通汲淺
泉更甘種沃年長豐生理左右足家有百歲翁乃知淳
朴全能完造化功何必濟淶河晏寢玄華宮

晚出西郊

晚日登西原勁風飄我衣蕭蕭班馬鳴野曠行人稀撫

轡無與語目送新鴻飛俗塵嘆久艱故山多蕨薇

同劉君俞城西寺避暑

節欲春秋交寒暑爭愈悍故知陰陽氣盛極暑方變七月庚伏末困弱但流汗天地一大爐造物虐相玩早衰虛實反舉動多顛眩安得甘露漿鑿頂沃清灌招提古浮圖歸壯壓西甸烈風無時休寂陰却炎暝幾有籃輿興客來發我願共遊不暇徐到寺日未旦童兒青芒屨潔洒花雨散斌駸溪石枕凝滑水紋簟張置相對卧境

閑心不亂有時聞妙香忽來傳靜飯飽起摩腹行看盡
長廊徧却呼竹窓僧汲泉具茗椀道在語嘿間淺深隨
所見同將煩惱蠲盡洗清涼觀茲游豈無益欲繼慎莫
緩

陳元常醉眠菴

淵明喜閒放自號葛天民我眠君且去人謂此語真無
機物莫猜鷗鳥猶狎馴欲眠何遣客一念已生塵豈如
龐德公相對忘主賓陳生性嗜酒大白舉浮身衆中時

酣卧常貯滿腹春
瀕洞更何物知容
幾輩人

欽定四庫全書

滴水集卷十

宋 李復 撰

五言古詩

首夏端居

美木交柔柯
疑疑衆葉光
餘春歸未盡
葉間有遺芳
空庭午陰寂
黃鳥轉新吭
微風從何來
穆然和且涼
虛堂面清池
文簟舒藜床
憇偃神意適
形骸亦相忘
蕭然無雜塵
始覺日稍長
寒暑迭往返
物生安有常
百年只瞬

息忍使生理傷起坐理素琴曲罷取酒嘗既飲復又酌
仰看閑雲翔得為太古民優游見羲皇

居山

居山不出山日飯鮮鹽酪野菜芼山米歡若屠門嚼蒼
蒼百歲翁常如一日樂人勸出山住掉頭終弗諾子孫
入市門賣薪食羹臠歸來舉糜杯持匕意自惡市門負
薪飧滋味固甚薄甘脆前方丈入腹毒於藥山翁意甚
長慎無厭澹泊

次韻君俞三詩時在山下

西陵大火流南融已頽征涼風拂庭樹
檄檄起秋聲遙夜抱膝坐耿耿河漢明
豈無尊中酒非君誰與傾

流水會大壑層岑出遙林結茅窮窈窕
細路下嶽峯風露浩滿野默坐掩孤衾
孤衾無與寫秋色日向深

朝採南山薇暮採南山蕨零霜百草腓
薇蕨行亦絕清溪有白石欲煮未可熟
故人在東山幽桂安得結

郊居五首

牛羊歸近籬鳥雀喧前林天曠白露下皓月吐東岑呼
兒掩柴門孤燈茅屋深欲寐問故裘中夜霜氣侵

禾黍已登場穞菽葉亦稀天晴日氣煖稚子負薪歸婦
姑具餉出飯豆菜葉肥白髮不自閑但悵筋力微

楸花不結實花落綠蒂肥彫零先衆木葉落蒂亦稀枝
直鳥不巢野藤相纏依藤蔓日更長楸覺生意微

歲回秋向閏九日菊未華青青東籬下強起折還家豈
無樽中酒對之空嘆嗟後日開已晚棄置今如何

種稻滿南澤露下稻已黃雨足暗泉滿秔稈各自長侵
曉負鑣去日暮積我場從今有晨炊璨璨珠玉光

出門

出門復入門所向常默默積陰久未開淒風起空谷孤
鴻鍛翮悲黃鵠飛亦獨舊耕半荒蕪自歎力不足

靜僻懶慢久煩喧厭入耳過客吐新談意況殊不美火
炎幾車薪難救一盃水但坐問鄰醅餘事莫掛齒

種禾滿東坡薺薺尺許長初苦夏日暴今為秋雨傷耘

耔不能施叢雜衆草荒農夫荷鋤歸無語空徊徨
夾徑梧十尋隱映柴舍深日期鳳鳥至柯葉交繁陰昏
鴉接翅歸不聞鳳鳥音秋風黃葉落感嘆傷我心

和石蒼舒喜雨

元祐丁卯春旱日透地赤三農失歲事嗷嗷嗟艱食宸
心動惻怛祠禱馳星驛張圖繪玄龜探穴求蒼蜴荒潭
幾挈餅方壇徒舞覲神龍忽應求飛灑自前夕蕩滌六
合清萬物湔蒸疫陰陽有沴氣備禦須多術聖人不罪

歲能助天地力風流仍叔詩宣王中興日

東齋獨坐

飛雨日蕭蕭秋風收晚暑掩關兀然坐默與玄相遇坐
久忽相忘玄我無賓主神遊出八紘鴻蒙見氣母

和人伏日

太極剖元氣五行均四時代謝密循環母子相挈維土
散無定位金德乘火馳天刑發殺機閉藏不敢施胚胎
勢力弱熾赫畏炎離聖人御陰陽恐侵西極虧遇庚防

畏禍用晦將待時曠然達生理燕息潛深思馬遷紀秦
事德公初置祠後世著令典賜告休百司曲學雖拘忌
消長自可推歲星東方出隱迹游天墀詎諧動漢帝割
肉蒙酒卮

負暄

朝坐前廡西晚坐前廡東日當正午時置榻兩楹中予
生本多羸憂患百箭攻三十已白髮歲常苦嚴冬凝陰
晝墜戶擁火裘蒙茸寒氣深刺骨有如嬰利鋒晨曦忽

入牖心喜舊疹空開門曝晴暖暄酣春意融融溫溫百骸
舒漸發兩頰紅乃知萬物生陽德有全功天輪浩無際
冥冥轉洪濛盧敖遊八極妄欲求初終卒然至濛谷見
呵鵲肩翁陽鳥出扶桑振轡馳六龍轉盼億萬里夸父
走追蹤遺策化鄧林狂奔如捕風我今觀天運四序周
無窮東西逐日車不出環堵宮上古有至人御風登璇
穹手挈日月行返景回高春陰陽在掌握默坐與天通
固知二子愚可嘆如壤蟲

冬日

日出東南隅轉側下西陸不經中天行但驚六龍速愁
寒餘月陰雲重欲壓屋霰雪飛不斷凝冰介萬木怒風
中夜起呼號鬼神哭鼓蕩溟渤傾勢欲翻坤軸十日未
肯回凍埋蛟龍縮城市百賈閉衾裯換斗粟蕭條觸事
艱更覺生意促安得青帝回愛景變鄒谷氣溫筋骸舒
負暄一飯足豈願北鄰富甲第厭梁肉

題朱老壁

居無百畝田廩有三年粟舍北幾株桑晚蠶食亦足近
水理蔬畦面山結茅屋夏風葦簟涼冬烟土床煖堂前
蒲萄架新實初垂綠清淨語不煩事任鞅掌僕鄰里通
有無泉甘草無毒誰知庚桑子今此居南麓予非市朝
人受性本幽獨願就謀一廛餘外百無欲

謁隱士段庭

人生何多謀常苦飢寒侵裘完甑有炊於世澹無心築
室清澗曲窈窕幽徑深閉門長松下歲無車馬音古書

東高閣兀然遺屨簪悠悠不記年日月徒光陰兒童城
市還得酒或自斟隱几望南山閒雲起孤岑

東文薦對報罷赴任有詩示予遂和

廣文予所知京國十年舊出背錦囊歸人嘲飯山瘦去
歲近臣薦三接期在晝孤鴻鍛翮久高舉或可就慘淡
辭都門顛頓不可救蕩蕩萬斛舟失在一孔漏相見嗟
塌翼誰與格困獸危根逐輕流蹇步難遠驟予庭有疎
松風聲響泉溜墻陰多雜花晴日漸妍秀都城帝子家

碧香寄新酎期君一來過獵獵直飛袖

秋晚謁東文有詩遂用其韻

庭木葉蕭蕭廣文官舍冷閉門過客稀讀書秋夜永病
起絮帽額聞風挈裘領一堂東西橫乍若登虛艇相對
兩無言孤燈弔形影雲翼未竄翥光陰惜俄頃雙壁君
羨虞三龍吾與邴世異泣傷麟意激軾怒黽萬事非偶
然屈伸難可並無逐顏波流自覺囂塵靜丹臺有珠宮
眺聽極疎迥君能喜清游登覽見殊景

出承天院候客

曉動人語喧門開探騎發冠蓋相後先烟塵互明滅出
城寒寺靜蒼松帶餘雪驅馬傍前廡投鞭坐僧榻畏風
依蒲團擁裘學趺結曛曠曉日昇逶迤旆成列到官今
年五踽踽幾持謁執板手有痕脫冠頂無髮將迎迹愈
多應接面常熱野性素曠蕩人事苦羈紲久願整歸駕
渡汾尋舊轍躬耕望雲岑築室俯清潏

泛舟滴水君俞用韓泛南溪韻作詩三首遂和

出城泛南溪朝暮可往返東西韋杜間尺五天不遠舟
轉皇陂曲岸帶青龍坂夷猶一篙足不待雙絙挽回臨
市橋艤走就僧居飯面山高閣重入門蒼松偃黯黯雨
意來蒼蒼野色晚更欲窮上方理履慚尚蹇

溪水秋更清天晴好行舟叩舷發吳歌蕩漾無時休朝
戲朱坡下暮宿青嶺頭勝事或有得隨意終日留往年
思此樂屢嘆來無由今我方求田意欲營東疇茲計儻
能就遂免卒歲憂身隨鷗泛泛心逐魚悠悠南舍與北

鄰杖策步可投更祈暘雨時禾稌常有秋

山虧一簣功泉廢九仞蹟精神去不回虛牝黃金擲
舟望南麓近岸多巨石溪流曲折多波喧奔湍激野竹
擁雜樹紛紛兩叅列古松氣不羣蒼然數百尺晚花發
幽叢浮雲動遙壁優游可忘年去此皆妄役

侯書記二子席上乞詩遂贈

植蒿不為棟豢豚不成虎本非英特姿雖長何足數男
兒生墮地便要立門戶謝鳳炳有毛羊豹兆於乳探根

咀其芽已足知甘苦吾黨有侯生高門映東魯翹然出
二子發祥自其祖小兒肌骨明珠光照合浦大兒神宇
深崇鼎氣象古學作四韻詩已無近俗語燃燈夜讀書
義頗識其痛來客見盡傾喜歎立如堵積慶固有獲力
穡刈薺稂人知須有成青雲張步武惜吾已老矣異日
衆必覩

送章發運棠

鄉農不寓兵經費半非古天下雖無事禁競必備武浚

郊開王畿屹然根本固鈎陳擁帝居百萬環貔虎軍聲
潮海驚牙帳屯雲聚臨難責死力溫飽當有素投身占
尺籍張口坐待哺梁野川瀆交掘泉不見土種沙禾稊
短官租閣王府國用取東南舳艫引吳楚浩浩九十州
連檣輸太庾秋風滿汴渠櫛比不可數登陞獻歲額供
億足贏數儲峙如丘山司農視新腐老幼無餒腹誰復
問暘雨天子念大計置官憂敗蠱苟非簡帝衷未肯輕
付與詔書忽西下秦臺更使斧精忠感帝聰異寵褒聖

語實資經濟術盡委浩劇務狼荒極海壖蜀江出荆渚
提封半禹跡綜錯均周賦際天聳風威列城歸刺舉西
北敵騎飛今猶急宸顧百姓瘡未平何處易星馭國事
有重輕先後存淵宁本根勢有重暫輟營調度大庭訪
衆議捨公孰可去惟公德宇深完養無驚懼若刀發新
硎音中桑林舞遠畫垂後世恥為目前慮冰雪淨聰明
涇渭包肺腑縱橫富萬術一一廊廟具出入未盡展興
論嗟齟齬峇峴雲間闕晚曦媚金羽雙旌過對揚當契

君臣遇拜賜親天光高議願一吐從容動凝旒必歎相
見暮庶幾慰美俗丹衢翔闊步蕭條耕巖客竊食慚無
補蹒跚世揶揄峯曲逃規矩舊學謾屠龍巧伎羞刻楮
芘賴托商陰濩落容魏瓠附驥仰後塵薦鶚玷過譽宴
坐接烏丸妙譚奉犀塵重借鵲枝栖不責馬曹誤推顏
已半生踴躍臨晚路今朝對行色悲風激林莽亂山雨
報秋荒野陰多霧孤禽失侶鳴回飛氣如縷

送呂思道

東平貴公子意氣區中窄手撚金僕姑青絲飛赭白欲
係單于頸封侯取鼎食四十心未展垂翅渭川側前日
來坐上天庭見黃色今朝報恩書戎幕進新職崆峒古
用武高旌出鋒鏑君當諧素期洗劍秋泉碧嗟予病摧
頽對別還悽惻待君載旆歸我作山中客

送僧惠本

山僧青芒屨厭踏城中土水風寒蕭蕭片影過沙渡晚
雲迎歸錫低飛暗石路暮鐘落前峰去衝後山雨

送人之鄧城

哀弄發危絃苦調出促管傷別骨欲銷坐失重續暖仙
鵠顧徘徊千里襄江潭此去袞袞情江水流不斷

送解敞

昔惜結懽淺今嗟傷別促離懷動秋雲清霜落羣木窮
山行路難歲晚自驅轂飛魂不可關昨夜先到蜀

答劉君俞

悠悠東武雲來抱南山岑南山有寒泉雲影落泉心泉

古湛不流雲靜閒不飛相與待明月千載發光輝

荅嚴隱之

美樹多來巢确土無報耕不問彼如何但責已所營聞
昔荆有鴟荆人惡其聲自荆將遷吳鳴鳩止其行爾欲
人不惡無若革爾鳴聲尚猶爾荆吳無異情晉子父
母邦鄉閭皆弟兄踽踽異嗜好遽云居齊城齊雖山川
殊是非如晉明已私不自勝齊人安肯平子行求吾詩
吾詩豈妄成贈子當發藥期子沉疴輕

荅屈爽

至人喜曠達所遇無形迹非樂重其放中心本純一東
晉尚書令簡文用王述論事匪卓越動意皆真率以此
能過人謝安亦降挹微物器褊淺舉趣半出匿靜坐本
無事城府強扃鑄終日如寒蟲啾啾復唧唧計校不滿
毫血盡死猶泣疾趨赴冥囂但如水就濕竟老何能為
紛然衆惡集古先有至言小人長戚戚

荅公孫及

輾轉卧不周遙夜何漫漫娟娟竹間月照我影零亂繁
蟲哀陰壁輕風泛幃幔節物自感人寤言興永歎顏坐
易銷沉去甚春水泮萬事隨俯仰飄忽浮雲散芳槿曜
朱華榮好常在旦百年無期度白日歲已晏餘生能幾
何可進投憂患駕矣追歡好東方明星爛

答吳與幾二首

人心如驚飈飄忽無定時默與身為讎晝夜萬里馳兀
兀形未彫茫茫神先疲所喪甚丘山所得微稗稊日月

不相饒矧可自傷夷志惜劇鋤鋤欲問孰能知種苗須
善本本善苗必滋養生須養心心怡氣不衰學問自可
求予言豈汝欺

舊廬鄰通衢先疇接近郊居無風雨憂歲免粒食勞生
理亦已愉胷中胡鬱陶楹桷思丹刻久厭處衡茅服味
喜鮮甘每羞視鋤耨德業倦時修憑虛事華豪鄭真耕
巖石張蔚隱蓬蒿內省重千鈞外物輕一毛當時笑寂
寞清節後世高原思貧非病賜也氣徒驕爾視季子金

何如顏氏瓢

和蘇內翰趙伯堅大卿清池詩

清池有華光深夜闇不發繁星雖燦燦含光待明月
熒孤螢飛來助明月輝明月出東屋螢向故林歸

平陽民杜裕民因買薪得紫石於薪中石有黝
理自然成觀音像相好端具觀察推官桑君安
學寫之於素以寄予遂為之頌

至心不可求虛明曠無迹應物乃現形遺影留茲石若

以色列見我洋海塵三尺諸像皆非相於茲何所得

十一月二十二日朝辭

朝辭承明殿暮下金馬門伏讀明詔意仰思聖主恩蠡
彼獯鬻氏禮數乃弟昆帝初為息民繒帛代更屯嗣皇
謹遵業使傳交塞垣下臣非知古有舌詎得論恭承丁
寧命敢不夙夜禱

辛順忠唐得道之士真身今在河州寺

少年遊嵩丘登高吾獨見西游渡隴坂脫屣古河縣削

髮俗網裂絕味諸漏斷卧脅三十年凝塵滿羌羣六月
大地焦爐中結冰霰牛頭實梅檀降出九重殿正就寂
滅時泉竭悲禽散直從開元初到今色不變破屋閉真
相野鼠嗅香篆時有碧眼人酌乳供新獻

觀梅次豫章公飲潤甫家韻

江梅犯晨霜噴薄弄晴景坐遣塞菹胃化作陂萬頃論
交貴皓首枯澹味方永戲探茱萸水飽食雲門餅日下
烟渚寒長歌敲柳癭

後園雙松

羣木喜春妍彫落寒霜苦昂藏兩大夫森然鬚鬣古堅
姿不可回正色少媚嫵清風發好音和氣琴中語

庭下牡丹

春晚午景遲氣暄困妍姿乘酣意縱放霞裾半紛披晨
起露風清肅肅爭自持相對默無語含羞畏人知

雨中觀池荷

急雨過池荷飛洒來縱橫光圓走青盤的皪寒珠明炫

轉勢不定積多忽自傾浩然江湖思蓬窓聽秋聲

梧桐

猗猗梧桐樹前日繁花馥西風不相饒影疎不可暴坐
看一葉落餘懷念羣木漫有千歲憂流光如急轂

種罌粟

前年陽亢驕旱日赤如血萬里隨羽書揮鞭無留轍炎
毒乘我虛兩歲苦病暍遇夏火氣高煩蒸不可活飽聞
食罌粟能滌胃中熱問鄰乞嘉種欲往愧屑屑適蒙故

人惠筠篴裏山葉堂下開新畦布蕚自區別經春甲未
圻邊冷傷晚雪清和氣忽動地面龜兆裂含滋競出土
新綠如短髮常慮蒿莠生鋤難不敢闕時雨近霑足乘
凌爭秀發開花如芙渠紅白兩妍潔紛紛金藥落稍稍
青蓮結玉粒漸滿房露下期採折攻疾雖未知適願已
自悅呼童問山鼎芳乳將可設

梨

柿垂黃尚微棗熟亦可剥新梨接亦成實大何磊落累

累如碧罌器宇極恢廓懸枝細恐折植竹仰撐托露下
色漸變逼霜味不酢採摘置中筵氣壓百菓弱憶昔壯
少時酒酣病瘡作取食不論數甘寒勝發藥今嗟老且
病滋味意彫索對之未能忘欲採引復却晴簷午景暄
尚或思咀嚼齒朽齧亦難把玩時自喙

慈恩寺枸杞

枸杞始甚微短枝如棘生今茲七十年巨榦何忻榮偶
以遺樵薪遂有嘉樹名雨露養秋實錯落丹乳明細蔓

如牽牛半枯猶絡縈晚葉已老硬不堪芼吾羹根大多
靈異歲久精氣成為取入刀圭顏顛掃霜莖

薤草

衆草費薤鋤回首已荒翳隨處競弟兄苟生無遠意時
亦吐柔蔓牽引強附離端居歎力寡門庭媿蕪穢

放魚

有客持巨魚造門前自陳敢致予產饋可待姜侯賓野
人不知薄但媿心美芹橫盤五尺餘飛光生目輪高鬣

丹砂尾長鬚黃金鱗
倔强忽起立意氣如有神
口頰雖噉喁哀訴何能伸
嗟哉自潛泳胡遘網罟屯
使居江湖間藏器養其身
得時感靈變呼吸乘風雲
奮迅彌宇宙洗滌萬物新
胡忍事一飯遽使刀俎親
無罪就死地惻然傷吾仁
解之謝來客放爾歸通津
不期明珠報相忘乃吾真
此去戒前禍芳餌為禍因
送爾吾自往世有鄭校人

種菜

同墻茅屋東有地十畝餘蒿蓬雜毒草壅閭惡木俱歲
久人跡絕亂穴狐虺居今晨杖藜出顧步良躊躇默嗟
咫尺間荒穢侵吾廬散米飯羣僕操具亟剪鋤攘剔先
叢棘斬伐多高樗乘濕束故急積供爨我厨耕土如蒸
麪治畦將種蔬時雨近霑洽膏脉涵如酥問鄰地所宜
嘉種願乞諸異有出戎夷遠或傳蜀吳根移甘或辛色
剖玄或朱蕪菁飯之半布藝廣數區牙甲助芬味瑣細
不可無霜降百物肅禦冬必此須居貧寡營辦親賓間

招呼盤飧多造次麤糲鮮羴腴收藏資舉筋率野真腐
儒澹薄味可久萬錢非我圖樊遲請學圃予今老為模
但媿公儀休拔葵謝園夫

松明

亢龍泄流津津融身自化蒼鱗困摧剝古鬣漸彫謝無
地逃斧斤豈願耀深夜萬牛空回首躊躇歎廣廈

晝坐東軒忽十三蝴蝶顏色鮮碧飛舞近人移
時方去紀之以詩

天上寶玉琴星徽點瑟瑟仙人手摩拂變化通靈術忽
隨琴聲起委蛻如蟬質飛翔下綠雲風翅含寒碧人間
清晝長遊覽喜自得見我餅中花羣遊過簾額高戲亂
疎幌低舞侵墮幘却疑午夢酣身是濠梁客栩栩出虛
庭興闌有歸色應聞調絃聲驚去歛無迹

登蠶

林間葉半空腹中絲欲生已老意更急食如風雨聲綿
蕭外周防條枝中交縈鼠雀爾無來共願十日晴

細細玄蟻浮蠕蠕寸蠖伸抱葉食囁囁負彩斑彬彬假
息方委蛻吐焚非謀身萬生爾甚微趨死成其仁

浴蠶

柳暖柔可結川晴流放光繫柳浴晴川簇簇古渡傍春
陽涵餘潤爛斑色青蒼衣被天壤周卵化初微芒

原蠶

蠶馬巨細殊異物同精氣物生不兩大此衰彼所致周
人禮有禁蠶為馬之祟織女天上明多蠶今為刺

咏蟬

委蛻疎竹根舒翼高梧枝攀緣擇陰翳意求物弗知清
曉喜零露晞晝弄涼颺長吟不能休自喜方得時

轉丸能升高藏丸必穴深么形感氣變默得幽憩心遇
冬潛厚地應暑登高林仙術爾何知動靜役陽陰

地僻小園靜羣木陰交浮蟬聲忽入耳物意颺驚秋嘒
嘒促徂暑西風動蕭颺滿林青青葉漸有搖落愁


題載記

河魚出龍門雲雷走平地飛騰不上天臨流夜生子生
子子有神怒風翻海水長爪探陽鳥中原苦腥氣鉗奴
不耕作揚鞭斷其尾黃犢養成斑奔登鄴城址豹來抱
虎兒新棘多鈎刺洛陽金鳳凰飛入漳河底東南寒日
短滿地邊塵起

種松

移松自南山昔種十三株連歲苦久旱十一已彫枯兩
株偶得生踰年未自如近覺稍得地翠柯漸扶疎乘春

抽芳心歲長二尺餘漸有干雲勢軒昂出楸梧對立聳
奇姿秀發動吾廬紛紛視衆木雀鵲望鳳雛清風為我
來飄爽洒我裾足為送老資日待偃蓋舒予今亦已老
顧步良躊躇想當千載後黛色凌天衢



欽定四庫全書

集部

滴水集卷十二

詳校官庶吉士臣吳烜

侍讀臣孫球覆勘

謄錄舉人臣李憲喬

欽定四庫全書

滴水集卷十一

宋李復撰

七言古詩

秋夜曲

客出古劍
示座中

玉刻麒麟煙縷直
生色屏風龜甲碧
青娥無聲滿空白
兔影西流轉斜隙
仙人蓮花殷葉開
當心吐光照愁魄
縵纓短後易水客
氣動燕山驕子泣
挽下天河倚渴傾
崑崙流斷無五色
銅匣新開北斗高
電光驚飛走空壁

鯨魚鬪死海水紅
欖櫓西出屯雲黑
酒酣揮舞七星寒
金精圯下留素策

出城

今日何日我心傷
出門下馬走東岡
東岡路高人迹斷
獨立矯首望八荒
長空澹澹地莽莽
停雲黯淡山淒蒼
回薄浩劫何渺茫
冥默銷沉寂無光
矜雄挾詐爭強梁
百年在世如風狂
變化俯仰旋銷亡
一丘已有萬骨殭
舊骨未朽新骨藏
丘壠累累爭相望
萬事意欲一槩

量齋志憤死世更長九月窮秋天欲霜悲風烈烈吹我
裳哀鴻求羣鳴且翔原野具腓草木黃百川東馳但湯
湯安得曦車挂扶桑高持北斗斟酒漿美人對坐舉瑤
觴與我笑歌憂弭忘

流泉引

泉涓涓兮出重山回抱山麓兮入於蒼淵流來孔多兮
自溢于林間出始一勺兮下合成川騰有稻兮壠有黍
聚以時兮令以鼓削高增卑兮醴渠絡縷人不愛力兮

揮奮如雨川流濬兮來無窮泥五斗兮水一鍾旱暵則
引兮淫潦則通自今以往兮樂我良農禮有經兮歲有
蜡羊豕盈牢兮農舞於社椒香桂綠兮雲車滿野敬謝
有功兮宜奠於泉下吾之將歸兮星律回秋告邦人兮
導畎澮之常流欲泉利之專兮先耘耨之不偷無忘吾
語兮若吾歲之來遊

惜花謠

搖搖牆頭花淺深爭灼灼容冶不自持飄揚成輕薄只

知朝為春風開不知暮為春風落人心愛春見花喜看
花却嫌花結子別愁常亂空中絮年光付與東流水今
朝還是見花開明日清陰滿綠苔寂寞流鶯歸去後忍
看落日上高臺

別鶴曲

寄李成季

碧海漫漫煙霧低三山風驚別鶴飛千年華表會能歸
不及雙鳥乘夜棲烏來相喜啞啞啼寒月影移庭樹枝
枝上營巢庭下食追隨應笑塵中客人生聚散羨雙鳥

烏若別離頭已白光陰百歲共有幾空有相思淚如水
因君試寫別鶴吟拂絃欲動悲風起

湖水歎

晚至西湖物意秋淒若有怨思遂作

岷山中斷洮水來分入西湖浸城址一落城陰不復回
餘波日轉臯蘭尾陰風淒冽寒氣早愁霧慘澹邊思起
誰言秋水澹無情默觀意亦有悲喜天軒地闢滄溟開
百川東奔如激矢龜龍受職日夜趨萬折必東效臣子
發源本願盈科進築防豈期因坎止日升不及浴雲龍

泥濶空能養荏葦停波寂寞雖無語物情得失應如此
淮陰野外乞餘食留侯圯下收墮履當年或失龍準翁
冷落功名千古耻我欲鳩工聚長鍾齊平決堤如決紙
直看驚湍萬里潮免嗟窮涸千山底

夔州旱

夔人耕山灰作土散火滿山龜卜雨春日不知秋有飢
下種計粒手中數七月八月旱天紅日脚散血龍似鼠
汙邪甌窶高下荒草根木皮何甘苦蠻商姦利乘人急

緣江轉米貿兒女已身死重別離輕歸州州南神有靈
歸人刳羊求山神驅風灑潤應香火飛點不到巫山村
巫山縣南也伐鼓不告歸神告神女江心黑氣卷江流
雷車載鬼雲中語太守身作勸農官子粒今朝多貸汝
春種須作三年計上滿隆原下水滸他時更勉後來人
老去子孫無莽鹵

兵餽行

調丁團甲差民兵一路一十五萬人鳴金伐鼓別旗幟

持刀帶甲如官軍兒妻牽衣父抱哭淚出流泉血滿身
前去不知路遠近刻日要渡黃河津人負六斗兼蓑笠
米供兩兵更自食高卑日槩給二升六斗纔可供十日
大軍夜泊須擇地地非安行有程驛更遠不過三十里
或有攻圍或鏖擊十日未便行十程所負一空無可索
丁夫南運軍北行相去愈遠不接跡敵聞兵侵退散隱
狡筭極深不可測師老凍餓無鬪心精銳方出來戰敵
古師遠行不裹糧因糧於敵吾必得不知何人畫此計

徒困生靈甚非策但願身在得還家死生向前須努力
征人白骨浸河水水聲嗚咽傷人耳來時一十五萬人
彫沒經時存者幾運糧懼恐乏軍興再符差點催餽軍
比戶追索丁口絕縣官不敢言無人盡將婦妻作男子
數少更及羸老身尪殘病疾不堪役室中長女將問親
暴吏入門便驅去脫爾恐為官怒嗔紐麻纏腰袍印字
兩脰束布頭裹巾冥冥東西不能辨被驅不異犬豕羣
到官未定已催發哭聲不出心酸辛負米出門時相語

妻求見夫女見父在家孤苦恨鈴竚軍前死生或同處
冰雪戰瘡徧兩脚懸淚尋親望沙漠將軍帳下鼓無聲
婦人在軍軍氣弱星使奔問來幾時下令倉黃皆遣歸
聞歸南欲奔漢界中途又為西賊窺悽惻自歎生意促
不見父夫不得哭一身去住兩茫然欲向南歸却望北
唐秘書省書目石刻

蓬萊高閣凌浮雲天上圖書奎壁明滎河溫洛龜龍呈
魯壁汲冢科斗行森羅萬目分緯經大官供烹集羣英

魯魚亥豕校讎精垂籤甲乙刻堅珉懷素無量元崇名
唐興百年人文成大盜一炬甚秦坑碑落人間如碎星
埋沒草莽荆棘平刊刻欲傳千萬齡毀滅今與糞壤并
牧童敲擊看火生鏗然清圓猶磬聲

玉泉寺

道人東立海上山錫飛西落大江北雙屨還乘海雲起
西過當陽駐山曲倚巖引錫神泉湧一道明虹出幽谷
兀然孤冥踞盤石清夜鬼神禮白足化城自化非人謀

七日煥然一何速雄樓傑閣鬱相望擁路十里長松綠
鳴鐘擊鼓四百年法席巍巍傾楚蜀堂上提印雲門孫
聞我足音下山麓門衙大路久慣入客館蕭蕭陰寒竹
春茶自造始開嘗色味甘新氣芬馥更窮上方縱登覽
峯嶂四環森萬木投老經過得少留明發飛塵暗征轂

過興德寺

用韓昌黎山石韻

行雨忽過漸細冉冉傍馬殘雲飛亂溪爭流經屢渡
近水短畦菰葉肥躋敬到寺石磴滑紅葉擁門人迹稀

升堂坐定聞魚鼓亦傳齋盃慰我飢久陰忽開日色薄
初見竹影搖牕扉開山寶塔真相在瞻拜入爐香霏霏
塔前蒼松盡手植到今百尺森相圍登覽未盡夜氣冷
拂榻置枕舒寢衣明星耿耿東方白僕夫結束馬已羈
老僧送客有勤意靜境幸到何遽歸

下元日朝謁回與李秉文冒雪過承天寺因題
二詩於僧壁

北風吹空天欲破急雪如筴塞空陸焚香初自藥宮歸

投鞭來就僧廬坐乾坤一色飛鳥絕市井無聲百賈餓
貧粟未給貧民啼空屋漏穿不可過

僧爐有令禁觸火袖手指直凍欲墮餅暖微聞蚯蚓鳴
客寒對作橐駝坐叩鐘擊魚呼衆起持鉢分糜救晨餓
一叅木佛古因緣試舉丹霞有何過

督運宿明堂川

在夏州北

督運晚宿明堂川鑿冰飲馬沙岡窟風沙正面立不得
驍騎輕兵忽馳突密雪擁渡無定河河帶血流浸人骨

帳中令下星騎來半夜促行更窮猝

鯨廟

治水弗績鯨當殛逃入羽淵為黃能韓山東北有荒廟
豕象冕服吁怪哉鄉社養牲禁畜豕恐觸神怒風雷災
秦漢以來不讀禮祝尸鼎俎如優俳魂魄久與魑魅雜
野妖陰怪憑草萊高山南北二千里谿谿鑿斷龍門開
昆侖長河走出海神禹功大不可偕後王書稱嗣天子
永為萬世嚴祠齋為崇王像備冠舄寢廡敞侈完傾摧

明飭有司正祀典春秋致祭吾自來

過高平縣

古長平也

蚩尤食昴乘鬼車韓國為窟秦為虵韓人畏虵渡河走
殺氣吹斷邯山斜秦鼓一擊趙括死四十萬人坑黃沙
白日忽落天地黑鴉銜碧火來人家至今野土盡血色
古鏃漬血生銅花髑髏銜恨骨不朽千歲開口生齒牙
秦怒垂涎急飢腹孱趙輕搏嬰其毒折戟沉槍鐵半消
洗磨赤墾曾封肉冤氣不絕起淒風滿眼山川無草木

晝陰夜慘少行人愁雨荒煙聞鬼哭秦兵掃蕩六國塵
兵禍弗戢須焚身博浪金椎擊不死亡秦終是韓國人

過澶州感事

孫村黃河決北流北使年年過澶州澶州兩城戰格盡
七十餘年廢不修昔歲契丹傾國起欲投馬蕃渡河水
烽火夜夜照前殿殿前羣臣色如死心憂社稷輸至忠
殿上只有寇相公默使敵計墮吾計獨屈黃屋親臨戎
敵驚潰奔虎北門從此願講兄弟親平時危冠盡肉食

一旦倉猝方見人

和遊趙韓王園

剝剝啄啄初叩扃主人立門雙眼青
籃輿處下屏徒御脫帽解帶風泠泠
倦思經時一日縱乍離涸轍遊滄溟
靚深曲折任吾向度橋繞徑足不停
芍藥晚花猶泣露櫻桃滿樹垂繁星
萬竹森嚴擁幢蓋蒼松夭矯呼風霆
空嘆春時不得到枯香落蒂今飄零
徒倚歷覽意稍滿自具野飯追醪醕
却呼主人坐對酌脯醢間錯魚鰕腥

共歎羈韁鮮休暇一餉聊爾消沉寔病餘量隘不禁醉
騎馬歸舍猶未醒解衣拂榻欲假寐傳呼有客來造庭

蒲城道中

羣虎鎖頸鷄連羣弓刀後先路暗塵劫錢殺人棄屍去
近山白晝無行人格捕死鬪血狼籍解衣黃金猶在身
傍云縱惡壞官法自來赴愬官中嗔

伊川道中

溪流冰盡搖日光夾岸弱柳千縷長野鳥深藏但聞語

山花半開初有香今朝伊川首西路昔年滴水過南塘
安得春風生兩腋從教吹到故山傍

過平泉鋪

去家十日九有雨林間怒鳩猶逐婦村店泥深晝閉門
繫馬臨河自炊黍生桑煙重不過爨麤糲如沙聊把筯
推盤急起却問程黃昏更望山巔成

下鐵礪嶺望秦川晚宿九谷

六月登礪如登天騰夷鐵礪須判年

騰夷亦山坂名

過險欲涉

渭水渡快眼喜見秦州川溪塍青秧下白鷺驛亭秀木
含疎煙投鞭清盥且展簾明日去酌北流泉

題步生所居

君今移居澗水東澗水暴漲侵近路盡取澗石成垣墻
生鑿岸柳作橋柱結茅構屋十數間取次面勢分幾處
看山看水督耕耨隨意自在不計步到處或坐或偃息
盡有室廬庇風雨土床竹簟雖草草已足自適奉寒暑
窓下瓦榼漆生光貫酒提攜老無數客來安更問誰何

漉魚拾蟹共烹煮青黃錯雜出木盤野藪山蔬四時具
久厭輕動踏市塵未嘗開口論世故究竟得意此寂多
向老尤要知其趣一生遇事皆任真仰首高風繼巢許

和沈潛誠崔氏園九尾龜

天生神物非偶然此龜不知今幾年世傳一尾直百歲
計應生在晉魏前長江不掛豫且網得來佳處遊林泉
穹然蒼甲大如屋欲負三山翔羣仙竒宮偶卦天地位
爻畫復出大易先惟昔寧王重為寶閔藏欲永萬世傳

今茲此寶世莫識但愛金字毛綠鮮仰視朝陽俯引氣
一閉千息常綿綿默然無言觀物化壽比彭錢猶更賢
陰陽靈變固莫測時或輕舉來巢蓮

督糧宿鹽州東

怒風吹雪急鞭馬匪兇匪虎率曠野護糧將軍夜不來
敦然獨宿在車下夏人驕狃敢侮王師問罪在一舉
半歲力盡竟無功哀哀生人命如土

西汶晚歸

今日雨晴雲出溪，
疎林荒僻色愀悽。
杖藜出步浚水曲，
白沙細草淨無泥。
漁人截流張巨網，
擊水驚魚魚更迷。
兒童喜見魚網重，
得魚貫柳畢提携。
林竹脩脩久不到，
夏笋迸籬生不齊。
或蓑或笠荷尺簞，
牛羊羣過喬木西。
野曠衣潤露已下，
回尋歸徑登故畦。
吾茅遙見隱暝靄，
到門隣舍雞亦棲。

村步

東阡南陌常經過，
臘破已覺春氣和。
出門仰視天宇靜，

暄暖自聞人語多青青短麥徧原隰耿耿殘雪明陵阿
身閒心適欲追酒惜無佳客來當歌

和李夷行遊西溪醉歸

輕輿共登大堤路左手持螯不問數風回驚怨落紅飛
把酒臨溪倚花樹杯中神物換凡骨直欲呼雲上天去
茂陵劉郎老更癡夜守銅盤飲寒露

雪中觀梅花

破萼江梅爭初吐漢宮妙香聞百步耐寒蛺蝶何自來

繞花翩翩那忍去幽芳不載蔚宗譜絕俗韻高吾最許
直疑滕王百幅圖淡墨濡毫添老樹冷蘂踈枝整復斜
倚杖時時暗香度惜無璧月懸中天令渠交光映當戶
莫作桓伊一笛風要看冰姿嬌挾曙

種桃

西郊移桃園散植東風一吹高數尺開花滿樹亂鶯綿
結實壓枝雜紅碧初年採摘不知幾三年花稀實少得
陰蟲食根膠自流今歲春餘愁寂歷須知花多必易朽

人間顏色安能久寒松森嚴少媚嫵回視衆木爾何有
不作羣花十日紅欲獻主人千歲壽

李花

桃花爭紅色空深李花淺白開自好前日含青意滋縮
今晨碎玉亂高杪暖風借助開更多餘陰鬱茁花還少
天晴不愁不爛漫後花開時先已老

牧童曲

牧童喜晴卧溪曲羣牛互鬪殘我竹驚起旁行不肯來

聞呼却走如生鹿園夫奮言辱其翁老翁操箬自驅逐
牛奔衝狂亂壞籬補籬更剪溪邊木

書飲客言

御史在前執法後先生飲酒不濡口脫巾露頂兩脚赤
先生飲酒不論石試問先生飲何如舉手指腹此誰測
東家閉門強偏仄刻骨膠筋束形跡一生寂寞養聲光
誰肯回頭顧枯魄南隣矜誇尚馳驚平明跨馬朝天去
車從導騎如雲屯謗辱丘山盈後路賜銅鑄錢終餓死

深居巷內還逢虎高天蒼蒼地茫茫與君舉首望八荒
人生優游本無事自置冰炭毒肺腸鵬飛鷁躍何高卑
菌短椿壽何彭殤百年倏忽不再得爭奪紛紛世界灰
渾沌不鑿人不死但知飲酒志願畢東方明星高西山
江水流明星却回江不斷與君常醉消白頭

欽定四庫全書

滴水集卷十二

宋 李復 撰

七言古詩

溫泉行

驪山鴻濛凝白煙山根陰火煮玉泉
陰靈炎炎燃礬石石焰不滅何千年
珠閣縹緲飛鳳來素衣仙人坐高臺
臺前香引流水出白玉蓮花九葉開
泓渟分去浮輕碧中有純陽無限力
四時獨不放春歸散向人間消百疾

瓊樹他年日月新霓裳舞動蜀山塵寒雲怨鎖遺宮冷
林葉巖花秋復春靈泉有靈天降福山神嚴呵不可觸
祖龍心穢慢神天毛髮流腥身被毒

孤鶩

孤鶩何時失舊羣空郊迴立如長人疾風拂地忽驚顧
欲起不起低昂頻遼東八月霜氣早萬里旅飛來南賓
雲間翩翩羽相接沙上雖離情更親空江誤駭虛絃響
飄亂哀鶩爭愛身第皇離散意奔翥形迹漂零心苦辛

拳曲悲鳴求遺穗稻梁收盡原野貧暮天蕭條侶影過
側頭仰望空傷神想能高騫投別伴思故未忍重求新
會向北歸却相見當看刷翮向前春

襄州大悲像

寶伽如來出海山隱身自畫如來像三日開門孤鶴飛
滿壁睟容現殊相一首千臂眼在手一一手執各異狀
日月山嶽星宿明鐘鼓磬鐸琴筑響矛戟戈劍利兵鋒
綦盞螺巾寶錫杖左右上下滿大千應機妙用不可量

金光宛轉徧沙界億萬人天盡回向昔聞如來發洪誓
慧目無邊破諸妄我今祝願果初心銷滅含生多劫障

論交

市井苟喜毫釐親節義動以肝膽許餘耳兆亂在交初
管鮑論財偶多與情偽安能盡一言是非必欲期千古
尼父已遠不得復夢寐恍惚與神遇

元日

元日擁戶如盤蝸門前輾轉多行車擁門喧呼客投刺

驚風舞雪翻飛沙幽室置火引就坐持杯暖腹客氣華
三杯油然衆客去庭樹瑟縮蹲山鴉

上已成季召會于西溪會上賦詩須多韻仍用
故事或舊詩十事已上未終席而成違者浮以
三大白罰者四人予與成季免焉

華林園中千金堤銅龍吐水天泉池

出鄴中記

八公山下劉

安臺城郭周圍雜花開

宋劉裕上已遊劉安臺

流金寶劍為秦出

綵鷁羽觴浮洛來著處祓除務是日西關千人萬人出

脩脩美竹帶林高激湍遠照崇山碧主人濟南舊詞伯
芸閣鈇丹事書冊載酒展席俯長流一飯未嘗畱俗客
拂地低回舞袖翻簫管哀吟動魂魄天晴初暖雲自嬌
風柔徐動花無力氣酣傾倒不自惜屢顧空尊有愁色
豈學飛蚊一餉樂論文清心聽鳴鐃詩壇誓衆軍令嚴
立表下漏不容刻神意慘淡諠譁寂疊簡搖毫辭舉白
欲徵故事入新語摯虞追歎慚束皙山陰衣冠交履舄
千載風流傳不息蠶紙墨妙龍鳳飛遠近家雞皆斂翼

明年此會恐難得俯仰之間已陳迹來者興歎感斯文
後之視今今視昔

夏旱

浮雲蔽空旱日熾日酷燒雲雲散裂雲怒漏穿未肯去
日光迸射千道血蔽天頑狠鬪不歇天工默默無與決
乘時爭勝更苦熱魚龍戢戢愁海竭

七夕和韻

東方牽牛西織女飲犢弄機隔河渚西風忽起怨夜長

相望盈盈不得語走投上帝貸金錢五雲飛來結香輶
曳裾拂露天榆冷照影回身桂葉偏銀潢七月秋浪高
黃昏欲渡未成橋却向人間借烏鵲銜石欲半河已落
碧霧為帳霞為裳絳節欲盡兩旂張燦然一星中耀芒
前瞻漢曲喜色長飈輪儼雅靈龍翔相迎交贈雙明璫
臨席舉袖開雕扇故人有似新相見共持深願祝天工
海底烏沉參不轉世間共傳牛女喜綺樓百尺排空起
垂綏挿竹動雲陰玉豆珠盤羅餐餌壺開綠酒淨於空

秋滿虛庭氣如水兒童不眠看星會白光奕奕搖飛旆
整衣低首祝深心未祝焚香先再拜瞳矐曉動斗車移
小雨班班怨別離天上還應分鳳軫人間又喜見蛛絲
空堂野老頭如雪不解祈巧但祈拙

重陽日獨居浚水君俞出遊杜曲惠詩訓以來

韻

衆人有錢競沽酒嗟我獨醒坐搔首荒徑蓬蒿深映門
茅舍三間傍疎柳南山奔騰呼欲來雲散山容一笑開

何似齊山江上客菊花須插滿頭回

和李教授攄遊溪阻風

去年春盡送春歸溪邊曾與春風期共期今歲春風到
却話去年相別時二月天回斗杓轉沙際春風猶未知
咄咄向空但書怪常有孤愁來兩眉南巷佳人佩蘭客
去年把葉同題詩能傳芳信慰枯槁問我溪邊來何遲
明發招邀出城去欲傍垂楊舉酒卮盲飈東來忽作惡
掀簸地軸搖天維坐客隔手不相見縮頸盡如藏殼龜

昏沙欲定日更黑浩浩崩奔陰雲垂蒼茫催人雨勢急
促轡競路爭先馳歸途邂逅過蕭寺投鞭思奕雲房棋
道人呼童拂廣榻笑我塵土兩目眊漫展紋楸第袖手
瞑依團蒲神意疲朝來共尋一餉樂齟齬似為神物欺
況乎人生百年間世事萬里多嶮巇紛紛智巧日夜鬪
一身浪苦寧非癡試向道人問實相指我自求無言師

和朱公掞禱雨五龍廟

太師占歲驗律管氣來姑洗聲猶短野人告病三月餘

公堂嚴齋五日滿相招禱雨陟南山出城鞭馬追飛繳
林鳩怒鳴競逐婦穴蟻移居自銜卵迎路商羊舞若飛
隨車少女風不斷陰昇陽交兆已見神意感通知憫旱
焚香瀝酒灑枯地草根清流忽盈盃茲事舊傳或未信
誠禱靈答知非誕祠亭豐碑高突兀歲紀神廳魏所纂
道武開國始南征矯首據鞍思勝算雲間仰見黑龍來
翔戲下山五為伴考卜推為受命符將拜帝休先沐澣
前瞻雷電塞空山築宮召堯敢辭懶鬼神填委煥丹青

草木森嚴無冗散登山層級繞巖巒趣門一徑極平坦
簫鼓于今幾百年暘雨無愆雩祭罕今朝霖霖千里蘇
太守憂民罄誠款四郊宿麥遠青青土膏脉潤天已暖
明朝牲幣躬脩報豈憚陟降步巘窺魯無禾麥書春秋
須知民事不可緩

依韻酬朱公揆給事

滄溟酌蠡天窺管龜兆何長筮何短什百倍蕝情不齊
斛龠釜鍾難槩滿東西地缺如斷缺西北天傾猶倚織

山糴何由蔚豹班荆雞豈解伏鵠卵雖許駕駘可累馳
所貴鎖鑰能立斷東陵瓜地久已荒南山豆苗歲常旱
日隨羣影塵滿衣愧竊太倉米盈盃默嗟世事意難期
却怪古書語多誕往來迅景急川流悵惘無間歸鬼纂
今年短髮颯驚秋餘日駸駸豈容筭逸驥空勤足未舒
寒燈靜弔影為伴數朝忽喜挹高風煩心執熱逢清澣
仰觀眉睫意可見已許交臂心無嬾飄零鍛翮感鸞悲
繩墨呈材媿樗散須思汲古得修綆却步歸愚識夷坦

惟君早歲嘆淹回白雪調高和宜罕諫垣密疏藁常焚
瑣闥舊風筆不款雲間遽與鴛鷺分邑里新歌襦袴暖
與我晤語若合契鋤去陵谷無隙窾因君相見慰蹉跎
再激平生嗟已緩

酬邢先生疊前韻

道人海南游五管野服襤褸鶴羽短飛符分藥濟炎州
陰功早約三千滿細葺柔蔓作重茵密綴圓荷為翠繖
丹回七返已成珠寶養三田如抱卵一身天畔若雲浮

萬事世間皆刃斷行山書篆虎逃穴臨水呼風龍救旱
弄琴得趣或忘絃遇酒無辭任傾盃試持舊說叩真詮
深笑浮言多詭誕須知至道甚無煩豈若俗書務集纂
向走天下四十年利口妄談何可算引枝逐葉盡無根
神與形離不相伴超然自得方自知天下一新如澡澣
生平聞風已默契今者相從敢縱嬾事來酬酢外須應
心不將迎意自散喜予雙眼爛熒熒知予靈臺常坦坦
寶身好事求雖多誠言出口識還罕赤水遺珠若為求

五雲瑤闕何時款
凌空未便御風行
跨馬先覺雙燈暖
輪扁運斤棄繩墨
庖丁解牛遊縈窾
太清吾祖遺真風
欲逐青牛媿駕緩

按視沙苑

南瀕清渭北洛水
寒沙東西橫百里
中條太華塞秦關
衆川無歸皆瀦此
地維忽斷兩山高
帝罰罔功五丁死
波飛浪激走東溟
積雪回汀擁都鄙
坡陀起伏接城門
薦草甘泉國馬屯
雲昏霧暗天駟下
星宮夜失房宿尊

驊騮騏驎種各有一一六印官字存開元籍馬七十萬
監苑舊政宜討論過都歷塊汗流血朝刷幽并暮楚越
天邊不從鑾輅行歲久空老狐狢窟去年駒生風雨腥
戴角肉鬣自有鱗廢人見怪棄於野騰入渭水方知神
與任鯤同按沙苑

寒空暗澹風滿衣縈回林薄相迫隨野花班班隱亂草
暮葉翩翩辭高枝渭水無烟但聞哭延州築城猶出師
四顧乾坤莽回互濺濺洛水東南馳

送人赴雅州任

去年送君走邊州今年送君入蜀道上官南北不自知
風卷孤雲離海嶠場屋爭飛二十年垂翼空歸嘆潦倒
綠衣晚出外家來一命初忻慰枯槁憶昨當途數論薦
謂君逸足須騰超故為羈繫尚淹蟠區區課額量登耗
辭尊有義不辭卑屈身斗祿貧親老蒙峯正在岷山西
新月殘時行始到連江地暖春無雪天際春來氣常早
君今此去春已盡江山綠滿花枝少人生離別難為情

莫戀異鄉風景好杜鵑忽傍耳邊啼回首秦川淚斑草

晉州會上送衛伯紹休官南歸

叔寶風流喜高簡非意相干以理遣勝日一言能造微
衆許冲情去人遠班班氣韻見諸孫秋水神清驚俗眼
追風逸驥自龍來照夜靈珠須海產結髮讀書棄人事
南上衡廬宿雲巘窮源欲探崑崙深導河猶恨積石淺
十年業白出石壁錯落青錢宜萬選長衢驤首向雲嘶
千里霜蹄思一展辛勤久未脫羈銜蹠足蟻封嗟蹢躅

去冬懷綬到并州投鞭三月春風滿溪邊行聽踏踏歌
草露忽驚人世短地下枯骨不沽名便棄華簪獨恨晚
尋山高頂白綸巾寄食但乞青精飯醺壇龍虎夜星寒
海嶠雲霞春洞暖憶昔相逢洛水橋偶來促坐襄陵宴
半生契濶一日逢互嘆參差不相見新鬢早驚蒲柳衰
舊事重論風雨散我今漸歎暮駸駸長卿多病嵇康懶
肯強塵沙立暝途逆流理櫂厭牽挽待君植杖武夷山
南去尋君任雙趺

趙蒙惠二詩酬以來韻

廣漢諸孫用心苦
疊疊妍譚殊可數
江南春意滿芳洲
長襲幽香佩蘭杜
世緣嚼蠟久無情
喜聞叔起有新聲
著書半百懸磬久
躡屨一日雙壁明
顧予畫脂已心朽
看君著鞭方力生
他時負雲縱六翮
上搏扶搖遊太清

法雲說法元非法六月洪爐舞飛雪寶香一瓣下天來
須彌座上金光發三界風雨動雷音八部人天歸象設

昔年關西舊夫子今日淮南大檀越揚眉師利傾千偈
隱几維摩無一說試開門戶立家風頻超初地無生滅
百川萬折必朝宗東南到海無分別紫陌紅塵拂面來
鐵壁不容通水泄衆形畢現明鏡靜浮雲飛蓋秋空澈
眼見億萬歸彈指境落毫釐差永劫野狂不是師子兒
磨了觜頭三尺鐵金湖巨浸一浮漚結果開花今幾葉
昔人卷簾仰天笑得道固應由慧業一言可盡千語迷
不如靜看水中月

答郎渙

蕭生陸沉自信篤白首抱關羞碌碌爾期速售恥干時
行為徒涉漸濡足鴻飛冥冥凌高秋南來亦有稻粱謀
無言盡戀江湖樂未肯相隨腐鼠求

依韻戲答胡沙汲

去年間君到漳浦庭樹鵲鳴簾燕舞今年間君入戰場
眉間黃氣如蒸霧風霜往回太行道空解寄聲託飛鳥
南城百里不著鞭輕逐歸雲高縹緲知君苦吟尚如舊

他日相逢更驚瘦明年射策對明光曾聽人歌虞虜否

依韻答胡直孺

東蒙野老工何拙刻楮三年不成葉迂途獨往自名愚
舉足常嫌投險捷忽然開口向時人機士笑驚多脫頰
半生長餓首慵回厭見糟醕能腐脅惟與孤雲靜往還
胎仙戲舞琴三疊江南墨客貌雖癯戰勝當前輕勇俠
潤身不貯世間珍別有驪珠光滿筐北游一見潛魄動
雙目爛爛巖光曄新詩幾幅起秋風使我靜觀但嚬聶

相逢便欲苦死留恐跨飛鯨動歸鬣

答李師載

早歲賢關初闖首五色長虹出君手孤坐傲兀若老羆
滿場輸伏甘居後巨榜清曉揭宮墻名姓喧傳天下口
天子未見已先知雲路風生看馳驟一官纔得墜驚波
顛頻衝風嗟莫救冥冥陰禍鬼發機羅網恢恢疎不漏
幽囚束縛落空山蟬腹龜腸餓荒藪黃雛乳鷲飛刺天
病翼傷垂自看醜男兒性命絕可憐萬事填臆難出口

天高地遠無消息日月回環歲閏九情之所鍾正在我
幾度寄音藏客袖辟書投拭召從軍寒出綈袍憐范叟
孤童匹馬渡盟津白髮青衫亦何有相逢握手話契濶
懷昔感今嗟嘆久巨幹堅姿老不衰霜雪蒼松性依舊
騏驎不合駕鼓車鏤鉏鬱鬱猶衝斗惟君與我同襟期
為君掃榻開東牖相對惆悵懷抱惡聊且撥置共尊酒
天地氤氲何事無白雲須臾變蒼狗冥心委順觀我生
任有垂楊生左肘

依來韻答謝教授啟還鄙藁語

老便收氣自暖腹厭見先漿動人目乘間縈思似秋蟲
終日牽絲不成幅廣文嗜好背時利妙律開雲發孤竹
已驚垂蚓得鯨歸更愧並貂持狗續可嗟按劍夜投珠
何異剖巖朝泣玉昨宵月暗風淒淒燈陰神物來聽讀
調李教授

君不見屈平放逐南辭楚顛顛行吟並江浦一聞鼓枻
笑獨醒搔首低回愧漁父又不見淵明彭澤投簪纓退

隱衡門依五柳凝塵滿匣不鳴絃頭上接離親漉酒爾
後寥寥幾百年醉鄉途路隔雲烟空看青鑑悲毛髮不
向芳尊問聖賢天邊酒星歎寂寞太白相逢發嘲諢悲
風苦霧動星愁欲惱寒蟾對杯酌舞袖低回雙鷗退曾
憶婆娑拂仙桂雲間月下兩茫然牢落江山無勝氣星
星今古夢中身巧力爭求身後名衛鶴莫矜軒冕貴魯
鵬曾見鼓鐘驚園林昨夜春風滿待得花開春已半流
鶯才怨曉紅飛布穀已催秋種晚藻間養子碧魚肥石

上拳牙紫巖齊柳下驚逢金驀裏花深聞唱白銅鞮須
知向眼光陰好忍困飢腸守枯槁明年雖見舊花開却
恐花枝笑人老終南紫翠倚天高渭水東流入海潮水
去不回山不改茫茫曾歷幾昏朝君看曠達是劉伶寵
辱冥心過一生枕麴漱醪方自得任從耳畔發雷霆

戲謝漕食豆粥

石泉清甘出山麓瓦釜貯泉烹豆粥太行苦霧朝塞門
相與持杯煖寒腹集仙學士著繡衣瑞節前驅光照玉

入境風生三十州高廩臨邊溢紅粟公臺深靜兵衛嚴
部吏趨承冠履肅剪毛胡羊小耳肥列甕釀香浮螳綠
盡嫌豪侈徹豐俎坐刻驚煤溫凍足擁爐招客學僧禪
爭聽敲魚醒睡目太師論詩歌蟋蟀千載遺音流晉曲
何曾方丈裂餅多武子琉璃蒸乳熟只知齒頰快芳羶
豈料年齡愁嗜欲但能舉鉢厭饑腸便覺古風親土俗
君不見錦帳匝地石季倫又不見冰澌渡河劉文叔竈
間燎濕困滹沱席上爭先出金谷豈惟暫飽濟艱難猶

貴速成勝珠玉昔人不願五侯鯖今我何知九鼎肉杜陵春晚把鋤歸常喜朝盤堆首宿莫嗟粗糲百年殮且免禍盈鬼瞰屋

題謝子高易義

東風吹園未曾出隱几潛心讀大易低頭不知客入門但見開編時點筆天開地闢日月明四時變化萬物成伏羲畫卦混沌死紛紛智巧彫元精

梁山

梁山蒼蒼寒日低武皇昔年留羽旂層宮突兀天上出
舉手欲引仙人衣仙人不來怨空老索莫時從東海歸
銅盤千里渡漳水茂陵草荒秋螢飛

野蠶

野蠶緣桑自成繭羣兒採繭殘桑枝明年家蠶黑蟻出
田中桑死蠶忍飢野繭更採不滿筐家蟻歲生無盡時
翁乎驅兒無殘桑葉長蠶成長有絲

酬慙長老退院作

掣電機鋒不容擬已逐驚飈落千里人生萬事孰為大
世上百年能有幾餘蔬殘肉豈能飽包束乾坤歸一指
今朝齋鉢掛空牆山前山後松風起

山寺禪者

敗屋數間叢萬竒虎豹到庭門下鑠自種石田一飯足
與語略能言璨可天昏霏霏小雪墮拾薪吹爐勸親火
葉藏巨栗大如拳撥灰炮栗來饋我